

«մուլք-ե խասս վա խալիս» — ملك خاص و خالص (հատուկ զուտ սեփական-նություն) արտահայտություն հետևելու և ապա եզրակացնում, որ դրանք այն հոգևոր էին, որոնք ազատվում էին պետական հարկերից և որոնցից ստացվող ամբողջ ռենտա-հարկը պատկանում էր կալվածատիրոջը²⁵: Առանձին գյուղերի, դանազան մուլքերի, այգիների և այլ կալվածների, այդ թվում հենց իր իսկ Պետրուշևսկու կողմից վկայակոչված Նախիջևանի խանության Շահբուզի մահալում գտնվող Հոռոմշին գյուղի երկու դանգի վաճառքին վերաբերող կալվածագրերում, առուծախի ամբողջ մանրամասնությունը արձանագրելուց հետո առհասարակ վերջում ավելացվում էր. «... և այս շարիաթական վաճառքով սույն մուլքը հիշյալ գնորդի սեփական անբաժանելի մուլքն է ու ապրանքը, և տերը կարող է տիրել նրան որպես իր մուլքերից մեկը»²⁶:

Շարիաթական նոտարական այս ձևակերպումը, որն, ինչպես ասվեց, հիշվում է համարյա բոլոր մուլքային կալվածքներին վերաբերող կալվածագրերում, չի կարող հիմք ծառայել ենթադրելու, որ այդ մուլքերը ինչ-որ հատուկ մուլքեր էին, որոնք օգտվում էին մուսուլմանական իրավունքից և որոնց հակամուտաներից պետությունը ոչ մի մաս չուներ: Ավելի քան անհիմն է կալվածագրերում կրկնվող այս արտահայտությունը նույնացնել «խալիս» տերմինի հետ: Մեզ հանդիպած մի քանի վավերագրերում «խալիս» տերմինը մուսուլմանական իրավունքից օգտվող մուլքերի համար չի պարունակում: Ընդհակառակը, Սիմեոն Երևանցու «Ջամբո» աշխատության մեջ Երևանի խանության Գրքիսրուպի մահալի Եղվարդ գյուղի մասին մի վկայությունից, ըստ որի XVII դարի վերջերում Երևանի խաները այդ գյուղը բռնագրավել էին որպես խալիս (Ջամբո, էջ 123), ինչպես նաև Թուման-ե Նախիջևանի Սիսաջանի մահալի Անգեղակոթ գյուղի վերաբերյալ մի վավերագրում եղած այն հիշատակությունից, ըստ որի այդ գյուղը նույն վիլայեթի խալիսներից էր և ամեն տարի իր «մալուջահթն» ու «վջուհաթը» պարտավոր էր տանել և Գորիսում հանձնել «նորին մեծության սարքարության պաշտոնյաներին», երևում է, որ այդ գյուղերի իրավական վիճակը ոչնչով չէր տարբերվում դիվանի գյուղերից²⁷: Այս վավերագրի «Թուման-ե Նախիջևանի խալիս» արտահայտությունը, ինչպես նաև մի շարք այլ վավերագրերում հանդիպող նման այլ արտահայտություններ իրավունք են տալիս ենթադրելու, որ խալիս գյուղերի եկամուտները անմիջապես տնօրինվում էին սովյալ վիլայեթի ֆինանսական վարչության և խանի կողմից և այդքանով էին միայն տարբերվում դիվանի գյուղերից:

Սակայն, խալիս գյուղերի թիվը XVI—XVII դարերում չափազանց սահմանափակ է եղել, ուստի և դրանց մասին վավերագրերում և սկզբնաղբյուրներում շատ քիչ է հիշված:

Պետք է ենթադրել, որ Սեֆեհիներից հետո և հատկապես հետնադիրյան շրջանում, երբ պետական կամ «դիվանի» հողերը մնացին տեղական խաների տնօրինության տակ և փաստորեն նույնացան «խալիսի» հետ, իսկ ավելի ուշ,

²⁵ Տե՛ս *И. П. Петрушевский* նշվ. աշխ., էջ 236—237:

²⁶ *Передняя Азия в документах*, кн. 1, Тифлис, 1937, док. 32, 33.

²⁷ Մատենադարան, *Կթղ.* դիվան, թղթ. 2ա, վավ. 69: رعاياي انكلكوت خالصه تومان نخچوان مالوجاهات و وجوهات خود را بوصول رسانیده بده بودند که در قریه گوریس تسلیم گما نشته سرکار عالیجاه معظم اییه نمایند